



*ODLUKA
O DODJELI PRIZNANJA
„KLJUČ GRADA SARAJEVA“
(prijedlog)*

*Predlagač: Komisija za izbor i imenovanja
Obrađivač: Gradska služba za Gradsko vijeće*

Sarajevo, juli 2019. godine



Na osnovu člana 26. stav 1. tačka 18. Statuta Grada Sarajeva („Službene novine Kantona Sarajevo“, broj 34/08) i člana 6. Odluke o priznanjima i nagradi Grada Sarajeva („Službene novine Kantona Sarajevo“, br. 34/10 – Prečišćeni tekst, 14/14 i 31/14), Gradsko vijeće Grada Sarajeva, na sjednici od _____ godine, donijelo je

*ODLUKU
O DODJELI PRIZNANJA
„KLJUČ GRADA SARAJEVA“
(prijedlog)*

Član 1.

Dobitnik priznanja „Ključ Grada Sarajeva“ je *Senator Robert Joseph "Bob" Dole*.

Član 2.

Dobitniku priznanja „Ključ Grada Sarajeva“ uručuje se priznanje izrađeno u obliku ključa, uz koje se dodjeljuje Povelja.

Član 3.

Priznanje „Ključ Grada Sarajeva“ uručit će dobitniku gradonačelnik Grada Sarajeva i predsjedavajući Gradskog vijeća Grada Sarajeva.

Član 4.

Ova Odluka stupa na snagu danom donošenja, a objavit će se u „Službenim novinama Kantona Sarajevo“.

PREDSJEDAVALJUĆI GRADSKOG VIJEĆA

Dr. Igor Gavrić

Broj: 01-GV-02- /19

Datum: _____ godine

OBRAZLOŽENJE

PRAVNI OSNOV

Pravni osnov za donošenje ove odluke sadržan je u članu 26. stav 1. tačka 18. Statuta Grada Sarajeva, kojim su utvrđene nadležnosti Gradskog vijeća Grada Sarajeva za donošenje Odluka o priznanjima i nagradi Grada Sarajeva. U članu 6. Odluke o priznanjima i nagradi Grada Sarajeva („Službene novine Kantona Sarajevo“, br. 34/10 - Prečišćeni tekst, 14/14 i 31/14) je propisano, između ostalog, da je Ključ Grada Sarajeva Priznanje koje se dodjeljuje afirmisanim i priznatim ličnostima, stranim državljanima koji su dali poseban doprinos razvoju i očuvanju civilizacijskih vrijednosti i poseban doprinos miru u svijetu, te da dodjela Ključa Grada Sarajeva simbolizira trajnu vezu Grada i građana Sarajeva sa ličnostima koje su zaslužile ovo visoko priznanje. Odredbama člana 15. stav 2. Odluke o priznanjima i nagradi Grada Sarajeva propisano je, između ostalog, da Gradsko vijeće donosi odluku o dodjeli priznanja, a odredbama čl. 12, 13. i 14. Odluke o priznanjima i nagradi propisani su ovlašteni predlagači (između ostalog i gradonačelnik), sadržaj prijedloga, te da se prijedlog dostavlja Komisiji za izbor i imenovanja Gradskog vijeća Grada Sarajeva, koja u funkciji odlučivanja o dodjeli javnog priznanja Grada Sarajeva, utvrđuje prijedlog.

RAZLOZI DONOŠENJA

Gradonačelnik Grada Sarajeva mr. Abdulah Skaka, uputio je Komisiji za izbor i imenovanja Gradskog vijeća Grada Sarajeva prijedlog da se *Senatoru Robertu Josephu "Bob" Dolu* dodjeli priznanje „Ključ Grada Sarajeva“. Podneseni prijedlog sa obrazloženjem, u prilogu je ove Odluke. Komisija za izbor i imenovanja Gradskog vijeća Grada Sarajeva je razmotrila prijedlog, te utvrdila Prijedlog Odluke i uputila ga Gradskom vijeću na razmatranje.

RJEŠENJA IZ PREDLOŽENE ODLUKE

Članom 1. je imenovan dobitnik priznanja „Ključ Grada Sarajeva“.

Članom 2. se propisuje da se uručuje Priznanje izrađeno u obliku ključa, uz koje se dodjeljuje Povelja.

Članom 3. se propisuje da Priznanje uručuje gradonačelnik Grada Sarajeva i predsjedavajući Gradskog vijeća Grada Sarajeva.

Članom 4. se definiše stupanje na snagu ove Odluke.

SREDSTVA ZA PROVOĐENJE ODLUKE

Sredstva za provođenje ove Odluke se osiguravaju u Budžetu Grada Sarajeva.



Broj: 01-05-5056/19
Sarajevo, 12.07.2019. godine

Bosna i Hercegovina - Federacija Bosne i Hercegovine
Kanton Sarajevo - GRAD SARAJEVO
GRADSKO VIJEĆE

PRIMLJENO: 12-07-2019			
Org. jed.	Broj	Prilozi	Vrijednost
	01-05-5056/19		

**GRADSKO VIJEĆE GRADA SARAJEVA
PREDSJEDAVALJUĆI GRADSKOG VIJEĆA
Komisija za izbor i imenovanja**

Predmet: Prijedlog za dodjelu priznanja „Ključ Grada Sarajeva”

Poštovani,

U skladu sa odredbom člana 12. Odluke o priznanjima i nagradi Grada Sarajeva („Službene novine Kantona Sarajevo”, broj 34/10, 14/14 i 31/14) kojom je, između ostalog, propisano da prijedlog za dodjelu priznanja može podnijeti gradonačelnik Grada Sarajeva, podnosim

**PRIJEDLOG
da se dodjeli priznanje „Ključ Grada Sarajeva”
Američkom senatoru Robertu Džozefu „Bob“ Dolu**

OBRAZLOŽENJE

Američki senator Bob Dole jedan je od najvažnijih ličnosti u izgradnji čvrstih prijateljskih odnosa Bosne i Hercegovine, posebno Sarajeva kao glavnog grada sa Sjedinjenim Američkim Državama.

Ugledni republikanski političar iz Kanzasa tokom svoje cijele političke karijere bio je vezan za našu zemlju i grad. Posebno u vrijeme agresije na Bosnu i Hercegovinu, ali i u godinama rekonstrukcije i obnove. U tom periodu, Dole je bio snažni zagovornik vojne intervencije koja bi zaustavila rat i razaranja u Bosni i Hercegovini.

Prema relevantnim studijama, upravo Dolov angažman u Senatu i pritisak koji je vršio na tadašnju demokratsku administraciju, bili su presudni u odluci bivšeg predsjednika SAD Bila Clintona da, zajedno sa NATO snagama, pokrene vojnu intervenciju u BiH.

Pored toga, Dole je vrlo jasno i precizno javno okarakterizirao događaje u BiH kao agresiju i genocid. Njegov doprinos kao predsjednika Međunarodne komisije za nestale bio je nemjerljiv u prvim godinama intenzivne potrage i identifikacije žrtava ratnih zločina.

Dole je u više navrata posjećivao Sarajevo i Bosnu i Hercegovinu, a njegov snažan politički glas kao bivšeg lidera većine u američkom kongresu podsticao je reforme i napredak Sarajeva i cijele države u protekle dvije decenije.



“Osjećam privilegiju i povezanost sa vašim gradom koji je preživio genocid, najtamniji period u historiji Evrope od Drugog svjetskog rata. Vaša hrabrost, solidarnost i otpor zlu bila su inspiracija ljudima širom svijeta. Iskreno se nadam da svijet više nikada neće svjedočiti takvom hororu, da smo svi izvukli pouke iz dešavanja u Bosni i da ćemo djelovati odlučnije kako bismo u budućnosti spriječili agresiju”, poručio je jednom prilikom Dole građanima Sarajeva.

Dole je dobitnik niza priznanja za doprinos i zalaganje za BiH uključujući i priznanje “Počasni građanin Kantona Sarajevo” koje mu je dodijeljeno 2014. godine.

Međutim, dodjela priznanje Ključ Sarajeva, bila bi kruna i najbolji način da se Sarajevo kao glavni grad BiH, simbolično oduži senatoru Dolu za nesebičnu pomoć, zalaganje i borbu za istinu koja nam je bila nerijetko važnija od humanitarnog angažmana.

Senator Dole je legenda američke politike s kraja 20. stoljeća, jedan od rijetkih političara tog kalibra koji je od samog početka bio zastupnik odlučnog protivljenja zločinu i agresiji te napretku i prosperitetu BiH kao države i Sarajeva kao glavnog grada.

Robert Džozef „Bob“ Dol je penzionisani američki senator iz savezne države Kansas, koji je tu funkciju obavljao u periodu od 1969. – 1996., a jedno vrijeme je bio i vođa većinske parlamentarne grupe u Senatu. Bob Dole je bio i kandidat Republikanske stranke na predsjedničkim izborima 1996., te kandidat za potpredsjednika na izborima 1976.

Zbog svega toga što je učinio za našu državu,

- Zbog javne i kontinuirane podrške državi BiH u toku agresije, te kontinuiranog zalaganja za vojnu intervenciju koja bi zaustavila rat i razaranja;
- Zbog kontinuiranog zalaganja za obilježavanje genocida u BiH kroz rad Međunarodne komisije za nestale;
- Zbog podrške Sarajevu kroz poricanje na reforme i napredak u protekle dvije decenije;
- Zbog pokazane dosljednosti prema državi BiH i Sarajevu od 1992. do danas,
- Zbog nemjerljivog doprinosa razvoju i očuvanju civilizacijskih vrijednosti i poseban doprinos miru u svijetu.

Smatram da Američki senator Bob Dole zaslužuje da mu se dodjeli priznanje „Ključ Grada Sarajeva” koji simbolizira trajnu vezu Grada i građana Sarajeva sa dobitnikom ovog priznanja.

S poštovanjem,

Gradonačelnik

mr. Abdulah Skaka s.r.